

Ár 2017, fimmtudaginn 22. júní, er í Félagsdómi í málinu nr. 16/2016:

Alþýðusamband Íslands
f.h. Eflingar stéttarfélags
gegn
Reykjavíkurborg

kveðinn upp svofelldur

d ó m u r:

Mál þetta var dómtekið 16. júní sl.

Málið dæma Arnfríður Einarsdóttir dómsforseti, Ásmundur Helgason, Guðni Á. Haraldsson, Lára V. Júlíusdóttir og Gísli Gíslason

Stefnandi er Alþýðusamband Íslands, Sætúni 1, Reykjavík, f.h. Eflingar-stéttarfélags, Sætúni 1, Reykjavík.

Stefndi er Reykjavíkurborg, kt. 530269-7609, Ráðhúsinu í Reykjavík, Reykjavík.

Dómkröfur stefnanda

Stefnandi krefst þess að viðurkennt verði með dómi að stefndi hafi gerst brotlegur við grein 1.4.2 í kjarasamningi Reykjavíkurborgar og Eflingar-stéttarfélags, síðast undirrituðum og framlengdum þann 13. nóvember 2015, með því að greiða starfsfólki sínu, sem eru félagsmenn Eflingar-stéttarfélags og ráðið hefur verið í tímavinnu samkvæmt grein 1.4.2, álag á tímavinnukaup samkvæmt grein 1.6. í stað yfirvinnukaups samkvæmt grein 1.5, vegna vinnu sem fellur utan dagvinnumarka eins og þau eru skilgreind í grein 2.2 í kjarasamningnum, sem og á almennum frídögum og sérstökum frídögum samkvæmt kjarasamningnum.

Þá er þess krafist að stefndi verði dæmdur til greiðslu málskostnaðar að mati réttarins að teknu tilliti til virðisaukaskatts.

Dómkröfur stefnda

Stefndi krefst sýknu af öllum kröfum stefnanda og krefst jafnframt málskostnaðar úr hendi stefnanda samkvæmt mati dómsins. Til vara er þess krafist að málskostnaður verði látinn falla niður.

Málavextir

Hinn 13. nóvember 2015 var þágildandi kjarasamningur Eflingar-stéttarfélags, sem á aðild að stefnanda, Alþýðusambandi Íslands, og stefnda Reykjavíkurborgar, sem runnið hafði samkvæmt efni sínu úr gildi 31. mars 2014, framlengdur til 31. mars 2019 með ákveðnum fyrirvörum og breytingum.

Í fyrsta kafla þessa kjarasamnings er fjallað um kaup. Í grein 1.1 í þessum kafla er kveðið á um að mánaðarlaun starfsmanns, sem gegni fullu starfi, skuli greidd samkvæmt tilgreindum launatöflum í fylgiskjali með kjarasamningnum. Þá eru þar ákvæði um launabrep, grein 1.2, og röðun í launaflokka, grein 1.3. Í grein 1.5 er að finna fyrirmæli um greiðslu tímakaups í yfirvinnu, en í grein 1.6 um greiðslur fyrir vaktaálag. Því næst er kveðið á um greiðslu desemberuppbótar í grein 1.7, auk þess sem sérákvæði um kaupgreiðslur til ræstingarmanna eru í grein 1.8.

Grein 1.4 ber yfirskriftina „Tímakaup í dagvinnu“. Þar segir í grein 1.4.1 að tímakaup fyrir dagvinnu reiknist sem 0,615% af launaflokki og launabrepi starfsmanns miðað við starfslaun að viðbættum einstaklingsbundnum launum. Í síðan segir orðrétt í grein 1.4.2:

Heimilt er að greiða tímavinnukaup í eftirfarandi tilvikum:

1. Nemendum við sumarstörf og í námshléum.
2. Lífeyrisþegum sem vinna hluta úr starfi.
3. Starfsmönnum sem ráðnir eru til skamms tíma vegna sérstakra árvissra álagstíma ýmissa borgarstofnana eða afleysingastarfa, þó eigi lengur en 2 mánuði.
4. Starfsmönnum, sem ráðnir eru til að vinna að afmörkuðum verkefnum s.s. átaksverkefnum.
5. Starfsmönnum, sem starfa óreglubundið um lengri eða skemmri tíma.
6. Starfsmönnum sem ráðnir eru í minna en 33,33% starf, 13 klst. eða minna að jafnaði á viku.

Í sérstökum skýringarkassa með ákvæðinu segir síðan:

Þegar unnið er utan dagvinnumarka, á almennum frídögum og sérstökum frídögum skal greitt yfirvinnukaup en á stórhátíðum er greitt stórhátíðarkaup. Hafi verið samið við starfsmann um að gegna reglubundinni vinnuskyldu alla virka daga nýtur hann leyfis á sérstökum frídögum og stórhátíðardögum sem ber upp á virkan dag án skerðingar á reglubundnum launum. Sjá ennfremur gr. 1.7.4 og 4.2.3.

Stefnandi vísar í stefnu til forsögu greinar 1.4.2 í kjarasamningnum. Hann kveður ákvæðið um tímavinnukaup eiga rót sína að rekja til kjarasamnings Starfsmannafélagsins Sóknar við Reykjavíkurborg og fleiri aðila frá árinu 1997 með gildistíma frá 1. apríl 1997 til 31. október 2000. Í fylgiskjali 3 með kjarsamningnum er að finna samkomulag Stéttarfélagsins Sóknar annars vegar og Reykjavíkurborgar og fjármálaráðherra hins vegar um réttindamál tímavinnnumanna sem undirritað var 13. maí 1998. Í 1. grein samkomulagsins er gerð grein fyrir því í hvaða undantekningartilvikum heimilt var að greiða tímavinnukaup í stað hlutfalls af mánaðarlaunum. Í skýringarkassa við 1. grein var bannákvæði sem mælti fyrir um að óheimilt væri að greiða vaktaálag ofan á dagvinnutímakaup. Í desember 1998 var Efling-stéttarfélag stofnað og tók til starfa um áramótin 1998/1999. Félagið varð til við sameiningu Dagsbrúnar og Framsóknar-stéttarfélags við Starfsmannafélagið Sókn og Félag starfsfólks í veitingahúsum. Við sameininguna varð Efling-stéttarfélag aðili að gerð kjarasamninga við Reykjavíkurborg um þær starfsgreinar sem áður tilheyrðu hverju stéttarfélagi um sig.

Í framlögðum kjarasamningi Eflingar-stéttarfélags og stefnda, dags. 22. mars 2001, var sett inn sérstakt ákvæði, grein 1.4.2, um heimild til greiðslu tímavinnukaups í undantekningartilvikum sem þar var lýst í fjórum töluliðum. Þá var með ákvæðinu sérstakur skýringarkassi, eins og í núgildandi kjarasamningi, þar sem sagði að óheimilt væri að greiða vaktaálag ofan á tímakaup. Því er lýst í stefnu að við samningsgerðina 2001 hafi annars vegar verið hafist handa við að samræma kjarasamninga þeirra félaga, sem sameinuðust í Eflingu-stéttarfélagi, í einn kjarasamning við Reykjavíkurborg og hins vegar hafi verið unnið að því að samræma kjarasamning Eflingar-stéttarfélags og kjarasamninga opinberu stéttarfélaganna, einkum að því er varðaði kjarasamning Starfsmannafélags Reykjavíkurborgar.

Með kjarasamningi Eflingar-stéttarfélags og stefnda, dagsettum 4. desember 2005, með gildistíma frá 1. október 2005 til og með 31. október 2008, var grein 1.4.2. breytt þannig að kveðið var á um að heimilt væri að greiða tímavinnukaup í tilteknum tilvikum í stað orðalagsins „í undantekningartilvikum“. Jafnframt var þeim tilvikum fjölgað frá því sem áður hafði verið. Orðalag greinar 1.4.2 hefur verið óbreytt frá árinu 2005 og er óumdeilt að efni greinarinnar hafi ekki komið til umræðu við kjarasamningsgerðina 2011.

Af gögnum málsins er ljóst að á árinu 2013 gerði stefnandi athugasemdir við greiðslu vaktaálags á tímakaup í stað yfirvinnukaups vegna vinnu tímavinnustarfsmanna. Samkvæmt framlagðri fundargerð samstarfnefndar Reykjavíkurborgar og Eflingar-stéttarfélags var á fundi nefndarinnar 3. september sama ár bókað að stéttarfélagið óskaði eftir upplýsingum er vörðuðu það fyrirkomulag að greiða álag ofan á tímakaup í dagvinnu þegar unnið væri utan skilgreinds

dagvinnutíma. Þá var þar bókað að fram hafi komið að um væri að ræða vinnu við reglubundnar vaktir á tímakaupi. Loks segir í fundargerðinni að fulltrúar stéttarfélagsins telji fyrirkomulagið ekki vera í samræmi við grein 1.4.2 í kjarasamningnum. Af gögnum málsins verður ráðið að ágreiningur aðila að þessu leyti hafi verið ræddur á fleiri fundum samstarfsnefndar en án árangurs. Þá liggja fyrir í málinu bréf frá Eflingu-stéttarfélagi til stefnda sem lúta að greiðslu vaktaálags á tímakaup tímavinnustarfsmanna frá árunum 2015 og 2016.

Málsástæður og lagarök stefnanda

Stefnandi vísar til þess að ágreiningur aðila lúti að því, hvort greiða eigi yfirvinnukaup ef vinna fellur utan dagvinnumarkaða eða hvort greiða megi vaktaálag ofan á laun starfsmanna sem starfi í tímavinnu hjá Reykjavíkurborg. Þeim starfsmönnum Reykjavíkurborgar, sem réttilega falli undir ákvæði greinar 1.4.2 í gildandi kjarasamningi aðila og fá greitt tímavinnukaup samkvæmt ráðningarsamningi eða launaseðlum, hafi ranglega verið greitt vaktaálag á dagvinnutímakaup í stað yfirvinnu- eða stórhátíðarkaups. Af hálfu stefnanda er byggt á því að samkvæmt skýru orðalagi greinar 1.4.2 og skýringarkassa sem því fylgi í gildandi kjarasamningi aðila skuli starfsfólk, sem starfi í tímavinnu, fá greidda yfirvinnu vegna vinnu á yfirvinnutímabili, á almennum frídögum og sérstökum frídögum eða stórhátíðarkaup á stórhátíðardögum. Stefnandi vísar jafnframt til forsögu ákvæðisins sem þegar hefur verið rakin.

Stefnandi telur að þannig eigi þeir starfsmenn, sem ráðnir séu í tímavinnu samkvæmt ráðningarsamningum og launaseðlum, að fá greitt samkvæmt grein 1.4.2, enda sé ákvæðið sett sérstaklega inn í kjarasamninginn vegna sérstöðu ráðningar og starfa slíkra starfsmanna. Þetta komi m.a. fram í framlögðum gögnum eins félagsmanns stefnanda, Birnu Sigurjónsdóttur. Eins og sjá megi á fyrirbyggjandi ráðningarsamningum Birnu sé hún ráðin í tímavinnu tímabilið frá júní til desember 2015. Launaseðlar Birnu fyrir sama tímabil sýni að hún fái greitt vaktaálag á dagvinnu í stað yfirvinnu, líkt og grein 1.4.2 kveði á um. Efling-stéttarfélag telur þessa framkvæmd eiga við um alla þá starfsmenn sem hafi verið ráðnir í tímavinnu eða fengið greitt tímavinnukaup.

Stefnandi tekur fram að af fyrirbyggjandi gögnum megi ráða að breyting hafi orðið á launagreiðslum tímavinnustarfsmanna í kringum 2009. Engar skýringar hafi fengist af hálfu stefnda hver ástæða þessara breytinga kunni að vera. Stéttarfélagið hafi hins vegar ekki fengið vitneskju um þessa framkvæmd fyrr en 2013 og þá strax gert athugasemdir við stefnda og hafi síðan þá verið í reglubundnum og stöðugum viðræðum við stefnda.

Stefnandi kveður stefnda hafa borið því við að hann hefði heimild til að greiða tímavinnustarfsmönnum vaktaálag á dagvinnutímakaup í stað yfirvinnu með vísan til greinar 2.1.5.2 þegar um reglubundna vinnu sé að ræða. Í ákvæðinu segi:

Þeir starfsmenn sem vinna reglubundna vinnu sem að hluta eða öllu leyti fellur utan dagvinnutímabils skv. 2.2.1 og 2.2.3 skulu fá greitt álag á þær vinnustundir skv. 1.6.1.

Efling-stéttarfélag hafnar því að umrætt ákvæði eigi við um launakjör tímavinnustarfsmanna. Ef ætlun aðila hefði verið sú að grein 2.1.5.2 tæki til tímavinnustarfsmanna, hefði borið að taka það sérstaklega fram í ákvæðinu. Ákvæði greinar 2.1.5.2 réttilega túlkað, m.a. með hliðsjón af skýru orðalagi greinar 1.4.2, geti einungis átt við starfsmenn sem vinni á virkum dögum og ráðnir séu á mánaðarlaun. Vaktaálag sé aðeins greitt ofan á mánaðarlaun, hvort sem þau eru heil eða hlutfallsleg, en aldrei ofan á tímakaup.

Stefnandi telur rétt að benda á að þeir starfsmenn, sem falli undir ákvæði greinar 2.1.5.2, fái greidd mánaðarlaun og njóti lengri uppsagnarfrests og veikindaréttar en þeir starfsmenn sem falli undir ákvæði greinar 1.4.2. Stefnandi nefnir sem dæmi að veikindaréttur starfsmanna í tímavinnu geti mest orðið 30 dagar samkvæmt grein 11.2.2 í kjarasamningi en veikindaréttur starfsmanns á mánaðarlaunum geti mest orðið 360 dagar samkvæmt grein 11.2.1.

Stefnandi bendir sérstaklega á að þegar orðalagi kjarasamningsákvæðisins um greiðslu tímavinnukaups hafi verið breytt 2005, hafi komið fram tillaga af hálfu Reykjavíkurborgar um að sleppa skýringarkassa ákvæðisins, enda væri slíkur skýringarkassi í raun óþarfur þar sem það lægi í augum uppi að starfsfólk í tímavinnu fengi greidda yfirvinnu utan dagvinnumarka. Tillögunni hafi verið hafnað af hálfu Eflingar-stéttarfélags og hafi niðurstaðan orðið sú að hafa skýringarkassann áfram inni í ákvæði kjarasamningsins. Samkomulag hafi að lokum orðið um að orðalaginu yrði breytt á þann veg að færa ákvæðið úr búningi bannreglu yfir í boðreglu. Í samninganefndum 2005 hafi setið Sigurður Bessason, Þórunn Sveinbjörnsdóttir, Ragnar Ólason og Sigurlaug Gröndal fyrir hönd Eflingar-stéttarfélags og Birgir Björn Sigurjónsson hafi verið formaður samninganefndar Reykjavíkurborgar.

Stefnandi kveðst sækja mál þetta á grundvelli ákvæða laga nr. 80/1938, um stéttarfélög og vinnudeilur, einkum 2. tl. 1. mgr. 44. gr. Málskostnaðarkrafa styðjist við reglur XXI. kafla laga nr. 91/1991, um meðferð einkamála, sbr. 69. gr. laga nr. 80/1938, um stéttarfélög og vinnudeilur, og krafa um virðisaukaskatt á málskostnað styðjist við ákvæði laga nr. 50/1988, um virðisaukaskatt.

Málsástæður og lagarök stefnda

Stefndi kveður ágreining aðila lúta að framkvæmd á útreikningi á launum starfsmanna sem ráðnir séu til starfa hjá stefnda á tímakaupi og sinni reglubundnum vöktum. Hafi þeim starfsmönnum verið greitt tímavinnukaup samkvæmt grein 1.4.2 í kjarasamningi aðila og svo álag eftir því sem við eigi í samræmi við grein 2.1.5.2 kjarasamningsins.

Stefndi hafnar því með öllu að hafa gerst brotlegur við ákvæði kjarasamnings aðila og telur að framkvæmd við útreikning og greiðslu launa þeirra starfsmanna, sem ráðnir séu í tímavinnu, sé í fullu samræmi við kjarasamninginn.

Stefndi byggir á því að skýra verði ákvæði greinar 1.4 í samhengi við önnur ákvæði kjarasamningsins svo og við eðli starfsins sem ráðið sé í. Ákvæði um kaup sé að finna í 1. kafla kjarasamnings aðila og það sé sá hluti samningsins sem mest sé notaður og oftast flett upp í. Jafnframt sé þessum hluta samningsins oftast breytt frá einum kjarasamningi til þess næsta. Kaup ráðist ekki aðeins af tímakaupi eða föstu mánaðarkaupi, heldur einnig álagsgreiðslum, eingreiðslum og uppbótargreiðslum ýmis konar. Í 2. kafla kjarasamningsins sé fjallað um vinnutíma. Um sé að ræða samræmdan kafla hjá flestum samningsaðilum stefnda. Kaflinn hafi komið inn í kjarasamninginn 2005 og hafi verið nánast óbreyttur síðan, bæði hjá stefnda og öðrum viðsejendum stefnanda.

Ákvæði 2.1.5 fjalli um hugtök og skilgreiningar. Í grein 2.1.5.1 segi:

Dagvinnumenn teljast þeir sem inna vinnuskyldu sína af hendi innan marka dagvinnu, sbr. 2.2.1. Dagvinnumenn geta tekið að sér yfirvinnu skv. 2.3 eða verið á bakvöktum skv. 2.4.

Í grein 2.1.5.2 segi:

Þeir starfsmenn sem vinna reglubundna vinnu sem að hluta eða öllu leyti fellur utan dagvinnutímabils skv. 2.2.1 og 2.2.3 skulu fá greitt álag á þær vinnustundir skv. 1.6.1.

Þá segi í skýringarkassa með grein 2.1.5.2 að „[s]lík störf eru m.a. á bókasöfnum og leikskólum sem hafa opnunartíma utan dagvinnumarkað.“ Stefndandi telur að þau störf, sem deilt sé um í máli þessu, falli ótvírætt undir framangreinda skýringu og að kjör starfsmanna falli að nefndum ákvæðum.

Stefndi bendir á að samkvæmt grein 2.1.5.1 í kjarasamningi aðila séu dagvinnumenn skilgreindir sem þeir starfsmenn sem inni vinnuskyldu sína af hendi innan marka skilgreindrar dagvinnu sem sé, samkvæmt grein 2.2.1, sú vinna sem unnin er kl. 8:00 - 17:00 frá mánudegi til föstudags. Í greininni sé einnig kveðið á um að dagvinnumenn geti tekið að sér yfirvinnu. Samkvæmt grein 2.3.1 teljist yfirvinna

vera sú vinna sem fari fram utan tilskilins dagslegs vinnutíma eða vinnuvöku starfsmanns, svo og vinna sem innt sé af hendi umfram vikulega vinnutímaskyldu þótt á dagvinnutímabili sé.

Stefndi tekur fram að í grein 2.2.3 komi fram að starfsmaður sem vinni hluta af vikulegri vinnuskyldu sinni utan skilgreinds dagvinnutímabils skuli fá greitt álag samkvæmt gr. 1.6.1 á þann hluta starfs síns en greinin kveði á um hvernig álagsgreiðslum skuli háttað. Sérstaklega sé tiltekið í grein 2.2.3 að vinna sem innt sé af hendi á laugardögum og sunnudögum svo og á sérstökum frídögum umfram vinnuskyldu skuli greidd samkvæmt grein 1.5 sem kveði á um með hvaða hætti tímakaup í yfirvinnu sé reiknað.

Í skýringarkassa með grein 2.2.3 segi:

Almennt gildir að þegar vinna starfsmanna er skipulögð þannig að hluti vinnuskyldu er inntur af hendi utan dagvinnumarka, þá skal greitt álag skv. 1.6.1 Í þeim tilvikum að samkomulag sé gert við starfsmenn að þeirra ósk um að þeir vinni hluta vinnuskyldu utan dagvinnumarka þá skal ekki greitt álag á þær vinnustundir sem falla utan dagvinnumarka.

Yfirvinna teljist því vera sú vinna, sem fram fari utan tilskilins daglegs vinnutíma eða vinnuvöku starfsmanns, svo og vinna, sem innt sé af hendi umfram vikulega vinnutímaskyldu, þótt á dagvinnutímabili sé.

Þá segi í grein 2.5.1 að greiða skuli þeim starfsmönnum, sem vinni á reglubundnum vöktum, álag fyrir unnin störf á þeim tíma sem falli utan venjulegs og skilgreinds dagvinnutímabils. Kafli 1.6 fjalli um álagsgreiðslur og vaktaálag og af orðalagi ákvæða kaflans verði ráðið að þau eigi við þegar vinnuframlagið, sem greiða eigi fyrir, sé hluti vikulegrar vinnuskyldu og falli utan venjulegs dagvinnutímabils. Þeir starfsmenn stefnda sem hér eigi undir séu ráðnir á tímavinnukaup á grundvelli 6. töluliðar greinar 1.4.2 í tiltekið starfshlutfall og inni af hendi vinnuframlag sitt samkvæmt fyrirfram tiltekinni og reglubundinni vinnuskyldu sem falli ýmist utan eða innan venjulegs dagvinnutímabils. Með vísan til þessa telur stefndi að það sé í samræmi við skýr ákvæði kjarasamnings aðila að greiða skuli vaktaálag á laun starfsmanna þegar um skipulagðar vaktir sé að ræða, jafnt þeirra sem ráðnir séu í tímavinnu sem þeirra sem ráðnir séu á mánaðarlaun.

Stefndi byggir einnig á því að samsetning launa verði að vera eins fyrir sömu störf til þess að gæta jafnræðis milli starfsmanna, sem vinna samkvæmt sama kjarasamningi, þótt starfshlutfallið sé mismunandi. Ef greiðslur ættu að vera með þeim hætti sem stefnandi haldi fram, myndi halla verulega á þá starfsmenn stefnda sem sinni fullu starfi, enda væru heildarlaun þeirra hlutfallslega lægri en þeirra starfsmanna sem að jafnaði sinna hlutastarfi með annarri vinnu eða með skóla.

Stefndi telur að með þeim breytingum sem gerðar hafi verið á kjarasamningi aðila á árinu 2005 hafi verið fallið frá þeirri túlkun að óheimilt væri að greiða vaktaálag ofan á dagvinnulaun tímaráðinna starfsmanna. Ef sú túlkun hefði átt að vera óbreytt hefði stefnanda verið í lófa lagið að halda inni því orðalagi sem áður hafi verið um bann við álagsgreiðslum á tímavinnukaup.

Þá byggir stefndi á því að framangreind ákvæði í kjarasamningi aðila hafi staðið óbreytt frá árinu 2005. Breytingu á fyrirkomulagi og framkvæmd kjarasamnings verði ekki náð fram nema með breytingu á viðeigandi ákvæðum við endurnýjun á kjarasamningi aðila. Frá því að grein 1.4.2 hafi verið breytt 2005, samhliða því að nýr kafli um vinnutíma hafi verið tekinn upp, hafi umrædd ákvæði ítrekað verið endurnýjuð, án breytinga eða athugasemda af hálfu stefnanda, og nú síðast í maí 2015. Hafi stefnandi verið ósáttur við framkvæmdina, hefði hann átt að koma athugasemdum sínum að við gerð kjarasamnings. Það hafi hann hvorki gert né lagt áherslu á að ná í gegn.

Stefndi tekur fram að umrædd framkvæmd hafi verið án mótmæla um árábil, bæði gagnvart stefnda og öðrum samningsaðilum stefnanda. Túlkun og beiting stefnda á ákvæðunum hafi fest sig í sessi og telji stefndi að stefnandi hafi með athafnaleysi sínu gagnvart framkvæmd samnings að þessu leyti sýnt af sér tómlæti sem verði að líta á sem þegjandi samþykki á framkvæmdinni.

Stefndi bendir á að í stefnu sé vísað til þess að við gerð kjarasamnings aðila árið 2005 hafi verið horft til kjarasamnings stefnda við Starfsmannafélag Reykjavíkurborgar varðandi samræmingu. Túlkun og framkvæmd á samhljóða ákvæðum í samningi starfsmannafélagsins hafi verið með sama hætti og um sé deilt í þessu máli um árábil án athugasemda.

Stefndi byggir sýknukröfu sína á því að hann hafi í öllu virt ákvæði kjarasamnings aðila. Túlkun hans á ákvæðum kjarasamningsins byggir á skýru orðalagi þeirra og gefi hvorki ákvæðin né skýringargögn og dómafordæmi tilefni til þeirrar túlkunar sem stefnandi kjósi að beita. Stefndi mótmælir skilningi stefnanda og túlkun hans á umræddum kjarasamningsákvæðum sem röngum og ósönnuðum. Stefndi telur, þvert á það sem stefnandi heldur fram, að orðalag greinar 1.4.2, sbr. önnur ákvæði kjarasamningsins, styðji túlkun hans og framkvæmd á ákvæðinu. Þá mótmælir stefndi því að forsaga ákvæðisins styðji túlkun stefnanda á ákvæðinu. Þótt í upphafi hafi verið gert ráð fyrir að starfsmenn, sem ráðnir hafi verið í tímavinnu, skyldu fá greidda yfirvinnu í stað álags, hafi því verið breytt með kjarasamningi aðila 2005. Í þessu sambandi bendir stefndi á að jafnræði hafi verið með aðilum við gerð kjarasamningsins svo og þeirra samninga sem gerðir hafi verið í kjölfarið. Stefndi hafi ekki komið að samningaborðinu með athugasemdir eða breytingartillögur við ákvæðin eða túlkun þeirra frá því að breytingarnar hafi átt sér stað. Þá mótmælir

stefndi því að mismunandi réttindi annars vegar starfsmanna sem ráðnir séu í tímavinnu og hins vegar starfsmanna sem ráðnir séu á mánaðarlaun skipti nokkru í máli þessu.

Um lagarök vísar stefndi til almennra reglna vinnuréttar og meginreglna samningaréttar um túlkun samninga, til laga nr. 94/1986, um kjarasamninga opinberra starfsmanna, laga nr. 80/1938, um stéttarfélög og vinnudeilur, og stjórnsýslulaga nr. 37/1993. Málskostnaðarkröfu sína styður stefndi við 1. mgr. 130. gr. laga nr. 91/1991, um meðferð einkamála, og kröfu um virðisaukaskatt á málflutningsþóknun við lög nr. 50/1988, um virðisaukaskatt, en stefndi kveðst ekki vera virðisaukaskattskyldur og beri því nauðsyn til að fá dóm fyrir skattinum úr hendi stefnanda.

Niðurstaða

Mál þetta á undir Félagsdóm í samræmi við 2. tölulið 1. mgr. 44. gr. laga nr. 80/1938, um stéttarfélög og vinnudeilur.

Í máli þessu leitar stefnandi staðfestingar Félagsdóms á því að stefndi hafi brotið gegn grein 1.4.2 í kjarasamningi aðila með því að greiða þeim félagsmönnum í Eflingu-stéttarfélagi, sem ráðnir hafa verið í tímavinnu, vaktaálag samkvæmt grein 1.6, en ekki yfirvinnukaup samkvæmt grein 1.5 í kjarasamningnum, fyrir vinnu sem fellur utan dagvinnumarkna, eins og þau eru skilgreind í grein 2.2 í sama kjarasamningi, sem og á almennum og sérstökum frídögum. Telur stefnandi að það stangist á við grein 1.4.2 en í skýringarkassa við ákvæðið sé mælt fyrir um skyldu til þess að greiða yfirvinnukaup við þessar aðstæður.

Af málalítilbúnaði stefnda verður ráðið að hann telji sér rétt og skylt, samkvæmt grein 2.1.5.2 í kjarasamningi aðila, að greiða sérhverjum félagsmanni stefnanda, sem vinnur reglubundna vinnu sem að hluta eða öllu leyti fellur utan dagvinnutímabils, álag á þær vinnustundir samkvæmt grein 1.6 en ekki tímakaup í yfirvinnu samkvæmt grein 1.5 í kjarasamningnum. Eigi það við óháð því hvort hann hafi verið ráðinn í tímavinnu samkvæmt grein 1.4.2 eða ekki.

Samkvæmt framansögðu kannast stefndi við að greiða starfsmönnum, sem njóta kjara samkvæmt umræddum kjarasamningi og ráðnir eru í tímavinnu, álag en ekki yfirvinnukaup fyrir vinnu sem er innt af hendi utan dagvinnutíma. Það sé gert þegar viðkomandi sinnir reglubundinni vinnu sem að hluta eða öllu leyti fellur utan dagvinnutímabils, sbr. grein 2.1.5.2 og grein 2.2.3 í kjarasamningnum. Þá eigi það einnig við þegar þeir sem ráðnir eru í tímavinnu ganga reglulegar vaktir, sbr. grein 2.5.1 í kjarasamningnum. Stefndi hefur ekki heldur andmælt því að við þessar aðstæður fái viðkomandi einnig álag, en ekki yfirvinnukaup, á almennum og sérstökum frídögum samkvæmt kjarasamningnum.

Kröfugerð stefnanda er almenn og verður að skilja málatilbúnað hans á þann veg að hann telji að sérhver félagsmaður í stéttarfélaginu, sem ráðinn hefur verið í tímavinnu hjá stefnda, eigi að njóta yfirvinnugreiðslna vegna vinnu utan dagvinnutíma, sbr. grein 1.4.2 í sama kjarasamningi. Tilvitnaðar greinar 2.1.5.2., 2.2.3 og 2.5.1 veiti að hans mati enga heimild til þess að víkja frá því. Samkvæmt framansögðu lýtur ágreiningur aðila að samspili þess sem fyrir er mælt í téðum greinum kjarasamningsins.

Grein 1.4 í framangreindum kjarasamningi ber yfirskriftina „Tímakaup í dagvinnu“, en greinin er í 1. kafla kjarasamningsins sem fjallar um kaupgreiðslur. Í grein 1.4.2 eru talin upp tilvik í sex töluliðum sem lýsa því hvenær stefnda er heimilt að greiða viðkomandi starfsmönnum sínum tímavinnukaup. Greinin felur því í sér undantekningu frá almennu ákvæði kjarasamningsins um greiðslu mánaðarkaus til félagsmanna stefnanda, sbr. grein 1.1.

Neðan við grein 1.4.2 er skáletraður texti innan ramma, en þar eru afdráttarlaus fyrirmæli um að skylt sé að greiða þeim sem ráðnir eru í tímavinnu yfirvinnukaup þegar þeir vinna utan dagvinnumarkað, á almennum frídögum og sérstökum frídögum. Ekki er þar vikið að neinum undantekningum frá þessu.

Eins og stefnandi hefur gert grein fyrir á þessi innrammaði texti rætur að rekja til kjarasamninga Starfsmannafélagsins Sóknar við Reykjavíkurborg frá 1997, en í sérstöku samkomulagi um réttindamál tímavinnumannanna, var kveðið á um að óheimilt væri að greiða vaktaálag ofan á dagvinnutímakaup. Fyrirmæli um þetta bann var í innrömmuðum texta við grein 1.4.2 í kjarasamningi Eflingar-stéttarfélags við Reykjavíkurborg sem samþykktur var árið 2001. Textanum var breytt í núverandi horf í kjarasamningi aðila árið 2005.

Þau ákvæði sem stefndi vísar til eru í 2. kafla samningsins sem fjallar um vinnutíma. Greinar 2.1.5.2 og 2.2.3 taka til þess þegar vinnutími starfsmanns er þannig ákveðinn að hluti reglulegrar vinnu fellur utan dagvinnutímabils samkvæmt grein 2.2.1 eða hann fellur að öllu leyti utan þess tímabils. Samkvæmt þessum greinum skal þá greiða álag fyrir þær vinnustundir sem falla utan dagvinnutímabils, sbr. grein 1.6.1 í kjarasamningnum. Fyrir vinnu á laugardögum og sunnudögum, sem og á sérstökum frídögum umfram vinnuskyldu, er þó greitt yfirvinnukaup, sbr. grein 1.5. Ákvæði þessi eru afdráttarlaus og ekki er þar vikið að frávikum sem þýðingu hafa gagnvart þeim sem ráðnir eru í tímavinnu. Grein 2.5.1 um vaktavinnu er einnig afdráttarlaus, en þar er kveðið á um skyldu til greiðslu álags til þeirra sem vinna á reglubundnum vöktum.

Greinar kjarasamningsins sem hér hafa verið raktar veita samkvæmt framansögðu ólík svör um réttindi starfsmanna stefnda sem njóta kjara samkvæmt kjarasamningi stefnda við stefnanda séu þeir ráðnir í tímavinnu og vinna reglubundið utan

dagvinnutíma. Ekki verður af texta þeirra beinlínis ráðið hvort rammagrein 1.4.2 skuli víkja í þeim tilvikum fyrir skyldu samkvæmt framangreindum greinum 2. kafla kjarasamningsins eða hvort síðargreindu greinarnar víki fyrir þeirri skyldu sem kveðið er á um í rammagreininni.

Í greinargerð stefnda var því ekki haldið fram að það hefði þýðingu við úrlausn þessa álitaefnis að mælt er fyrir um skyldu til að greiða yfirvinnukaup, þegar unnið er utan dagvinnumarka, inni í römmuðum texta í framlögðum kjarasamningi. Því var aftur á móti hreyft í skýrslu Birgis Björns Sigurjónssonar, fjármálastjóra stefnda, fyrir dómi og vísað til þess við málflutning að þessi texti væri ekki eiginlegur hluti kjarasamningsins, heldur settur til skýringar. Af hálfu stefnanda var þessari afstöðu mótmælt efnislega.

Af skýrslu Birgis Björns, sem og skýrslum Sigurðar Bessasonar, formanns Eflingar stéttarfélags, og Ragnars Ólasonar, þjónustufulltrúa Eflingar stéttarfélags, verður ráðið að efni umrædds texta í téðum ramma hafi verið samningsatriði milli samningsaðila við gerð kjarasamningsins 2005, eins og aðrir hlutar hans. Allir sátu þeir í samninganefndum aðila við kjarasamningsgerðina 2005. Þótt yfirlýstur tilgangur rammagreinarinnar sé að vera til skýringar mælir greinin með afdráttarlausum hætti fyrir um tiltekin réttindi þeirra sem eru ráðnir í tímavinnu. Verður að líta svo á að við ágreining um réttindamál viðkomandi starfsmanna hafi stefndi skuldbundið sig til þess að skýra grein 1.4.2 á þann veg sem fram kemur í rammagreininni. Hefur greinin þannig skýrð sömu stöðu og aðrar greinar kjarasamningsins.

Að þessu sögðu verður að huga að því hvort unnt sé að líta á grein 1.4.2 sem sérákvæði gagnvart fyrrgreindum greinum 2. kafla kjarasamningsins eða hvort sá kafli gangi framar ákvæðum greinar 1.4.2. Í því efni leggur dómurinn áherslu á að grein 1.4.2 er, að teknu tilliti til þess sem segir í rammagreininni, sértækari að efni til en tilvitnaðar greinar 2. kafla kjarasamningsins. Í því sambandi skiptir máli að þar er fjallað um tilgreindan hóp starfsmanna sem ráðinn er til starfa á sérstökum kjörum öndvert við starfsmenn sem fá greidd mánaðarlaun, sbr. grein 1.1 í kjarasamningnum. Meiri þýðingu hefur þó að í greininni er sérstaklega vikið að því hvernig haga skuli greiðslu fyrir vinnu utan dagvinnumarka, án skilgreiningar á því hvort um er að ræða óreglubundna eða reglubundna vinnu og þannig skírskotað efnislega til þess sem segir um tilhögun vinnutíma í 2. kafla kjarasamningsins og greiðslu fyrir vinnu utan hefðbundins dagvinnutíma. Öndvert við þetta fjalla greinarnar í 2. kafla kjarasamningsins almennt um það hvernig haga skuli greiðslum við þessar aðstæður án þess að skírskotað sé til efnisatriða í grein 1.4.2. Í þessu ljósi verður að líta á grein 1.4.2 sem sérákvæði sem gangi lengra en fyrrgreindar greinar 2. kafla kjarasamningsins.

Þar sem líta verður á grein 1.4.2 sem sérákvæði gagnvart öðrum greinum kjarasamningsins sem fjalla almennt um rétt til greiðslna utan dagvinnutíma verður að fallast á með stefnanda að túlka beri kjarasamninginn á þá leið að fyrrnefndar greinar 2. kafla samningsins víki fyrir grein 1.4.2. Fær dómurinn ekki séð að það geti haft þýðingu í málinu þótt þessi niðurstaða kunni að leiða til þess að þeir sem ráðnir eru í tímavinnu, og sinna starfinu að öllu leyti eða að hluta utan dagvinnutíma, njóti betri launakjara en þeir sem eru á mánaðarlaunum og vinna á reglubundnum vöktum. Í því sambandi verður að hafa í huga að það er á valdi stefnda að ákveða hvort hann ráði starfsmann í sína þjónustu í tímavinnu, þegar það er heimilt samkvæmt grein 1.4.2, eða ráði hann eftir atvikum í hlutastarf og/eða tímabundið þannig að hann fái mánaðarlaun greidd samkvæmt grein 1.1 í kjarasamningnum.

Ekkert bendir til þess að Efling-stéttarfélag hafi fengið vitneskju fyrir en vorið 2013 um að stefndi hafi tekið upp á því, í kjölfar breytinga á kjarasamningnum 2005, að víkja frá þeirri skyldu sem kveðið er á um í grein 1.4.2 þegar tímavinnustarfsmenn vinna reglubundið utan dagvinnutíma. Síðan þá hafa aðilar deilt um hvaða skilning eigi að leggja í kjarasamninginn að þessu leyti. Ekki liggur fyrir að fyrirsvarsmenn stéttarfélagsins hafi fyrir þann tíma mátt gera sér grein fyrir þessari framkvæmd hjá stefnda. Því kemur ekki til álita að stefnandi hafi veitt „þegjandi samþykki“ fyrir framkvæmdinni eins og stefndi vísar til. Málsástæðum stefnda er lúta að þessu atriði er því hafnað.

Í ljósi þess sem hér hefur verið rakið ber að fallast á kröfu stefnanda eins og í dómsorði greinir. Með vísan til 1. mgr. 130. gr. laga nr. 91/1991, sbr. 69. gr. laga nr. 80/1938, verður stefnda gert að greiða stefnanda málskostnað, sem þykir hæfilega ákveðinn 500.000 krónur.

D Ó M S O R Ð:

Viðurkennt er að stefndi, Reykjavíkurborg, hafi brotið gegn grein 1.4.2 í kjarasamningi Reykjavíkurborgar og Eflingar-stéttarfélags frá 13. nóvember 2015 með því að greiða starfsfólki sínu, sem er félagsmenn Eflingar-stéttarfélags, og ráðið hefur verið í tímavinnu samkvæmt grein 1.4.2, vaktaálag á tímavinnukaup samkvæmt grein 1.6 í stað yfirvinnukaups samkvæmt grein 1.5 í kjarasamningnum, fyrir vinnu sem fellur utan dagvinnumarka eins og þau eru skilgreind í grein 2.2 í kjarasamningnum, sem og á almennum frídögum og sérstökum frídögum samkvæmt kjarasamningnum.

Stefndi greiði stefnanda, Alþýðusambandi Íslands fyrir hönd Eflingar-stéttarfélags, 500.000 krónur í málskostnað.

Arnfríður Einarsdóttir

Ásmundur Helgason Guðni Á. Haraldsson
Lára V. Júlíusdóttir Gísli Gíslason